



# Akilersuuteqarnissamik suliat

Akilersuuteqarneq sunaava aamma kina akilersuutinik pisartussaava?  
Akilersuutit suut pineqarsinnaappat?  
Eqqartuussisoqarfiup suliaq qanoq suliarisarpaa?

| Kalaallit Nunaanni Eqqartuussiviit |

## **AKILERSUUTIT SUUPPAT?**

Akilersuutit tassaapput aningaasat akilerneqartussat, inuup allap ullormut aningaasartuutaanik matussusiinermut tapertaasussat.

## **AAPPAASUMUT AKILERSUUTIT**

Aappariit averuserpata avippaataluunniit eqqartuussisut pissutsini immikkut ittu-  
ni aalajangiisinnaapput aappaasoq aapparminut akilersuissasoq. Aappaasumut aki-  
lersuutit taamaattut averusernermut avinnermulluunniit atatillugu aalajangersar-  
neqartarput kingusinnerusukkullu oqartussanit, akilersuutininik aalajangersaasunit,  
allanngortinneqarsinnaallutik.

Aappaasumut akilersuutininik aatsaat pisoqarsinnaavoq sivirusumik katisimasima-  
gaanni aamma isertitaqarnissamut periarfissaq appariinneq pissutigalugu ajorse-  
riarsimappat. Aappaasumut akilersuutit pillugit paasisaqarnerusinnaavutit averu-  
serneq avinnerlu pillugit quppersakkami.

## **MEEQQANUT AKILERSUUTIT**

Angajoqqaat marluullutik nerisassanut, atisanut, meeqqerivinnut allanullu akilee-  
qataasussaapput. Angajoqqaap aappaa aningaasartuutininut akileeqataajumangip-  
pat eqqartuussisoqarfik aalajangiisinnaavoq angajoqqaq taanna meeqqanut aki-  
lersuissasoq.

Meeqqamik najugaqateqartoq akilersuutininik piunasaqarsinnaavoq. Meeraq mee-  
rarsiaappat angajoqqaarsiat angajoqqaaniit tamaniit akilersueqqusisinnaapput.

Meeqqamik najugaqateqartoq akilersuutininik makkuninnga qinnuteqarsinnaavoq:

- Meeqqap 18-inik ukioqalernissaanut aningaasartuutit nalinginnaasut
  - Meeqqamut ataatsimut akilersuutit nalinginnaasut qaammammut kr. 1.000-iupput.
  - Akilersuisusaaq immikkut isertitakkaajuppat qaffasinnerusunik akilersuititsisoqarsinnaavoq
- Kuisinnermi akilersuutit ataasiarluni akiligassat kr. 763-iupput.
- Meeqqap napparsimanerani ilisaanerani luunniit immikkut aningaasartuutininut immikkut akilersuutit
- Apersortinnermut akilersuutit ataasiarluni akiligassat kr. 3.033-upput.
  - Meeraq apersortissanngippat atisassarsiutissanik akiliisitsisoqarsinnaavoq
- Ilinniarnermi akilersuutit ilinniartunut 18-it 24-llu akornanni ukiulinnut akilersuutaapput

Anaanaasoq pilersorneqarnissaminut akilersuutininik qinnuteqarsinnaavoq qaammammut 605 kr., erninissamut qaammatit marluk sioqqullugit, ernereeraannilu qaammat ataatsimut. Taakku saniatigut anaanaasup ernineranut atatillugu aningaasartuutininut 573 kr. tapiissutitut akilerneqassapput.

Attaveqarfissat pillugit paasissutissat eqqortut qinnuteqaammi allanissaat pingaaruteqartorujussuuvoq. Illit najugaqarfiit illuatungerisavilluunniit najugaqarfia eqqortoq ilisimatitsissutiginnikkukku eqqartuussisoqarfiup suliaq itigartitsissutigissavaa. Eqqartuussisoqarfiup aatsaat suliaq suliarisinnaavaa, eqqartuussisut paasissutissat pisariaqartut tigoreerpatigut.

### **AKILERSUUTINIK QANOQ QINNUTEQARTOQARTARPA?**

Eqqartuussisoqarfimmut anaanaasup njugaqarfianiittumut saaffiginnilluni meeqqanut akilersuutininik qinnuteqartoqarsinnaavoq. Akilersuutininik piniaraanni immersugassaq immersorneqassaaq, taanna eqqartuussisoqarfimmi pineqarsinnaavoq imaluunniit uani nanineqarsinnaavoq: [www.eqqartuussivik.gl](http://www.eqqartuussivik.gl), nammineerutissat/immersuiffissat.

### **SULIAP INGERLANNEQARNERA**

Eqqartuussisoqarfiup qinnuteqaat tigoreerpagu eqqartuussisoqarfimmiit angajoqqaajusumut, qinnuteqartup akilersueqqusaanut, allagaqartoqassaaq. Allakkanik tiguisusaaq suliami akissuteqarnissaminut sap. akunnerinik sisamanik piffissaliivigineqassaaq.

Allakkanik tiguisusaaq sap. akunneri sisamat qaangiutsinnagut akissuteqanngippat eqqartuussisoqarfik aalajangiisinnaavoq angajoqqaq, meeqqamik najugaqateqanngitsoq, akilersuissasoq. Eqqartuussisut suliami aalajangiinissaminni atugassaminnik paasissutissanik amigaateqarunik namminneq paasissutissanik piniarsinnaapput. Soorlu eqqartuussisut Akileraartarnermut Aqutsisoqarfik attaveqarfigisinnaavaat illuatungeriit isertitaat pillugit paasissutissanik piniarfigalugu.

Angajoqqaq akilersuuteqarnissaminut akerliliippat, eqqartuussisut illuatungeriinnik eqqartuussinissamut, eqqartuussisumit peqataaffigineqartumut, aggersaasinnaapput.

Eqqartuussisut aalajangiinertik illuatungeriinnut tamanut nassitissavaat. Eqqartuussisut aalajangiissappata akilersuisoqassasoq taava akilersuisitsinermut allaffik Kommunimiittoq aalajangiineq pillugu paasitinneqassaaq.

### **ATTAVEQARFISSAQ**

Arlaannik nalornissuteqaruit imaluunniit ilitsersorneqartariaqaruit paasissutissat amerlanerit uani takusinnaavatit: [www.eqqartuussivik.gl](http://www.eqqartuussivik.gl) imaluunniit eqqartuussisoqarfik sianerfigisinnaavat: 36 38 00